



# Melino 'i he Māmaní mo e MELINO 'IA KALAISÍ

'E lava ke foaki mai 'e Sīsū Kalaisi ha melino 'oku tolongá, neongo e ngaahi faingata'á mo e ngaahi 'ahi'ahí.

## Fai 'e Sarah Hanson

‘ha māmani ‘oku moveuveu fakasōsiale, fakapolitikale mo fakalotu, ko e hā ‘okú ke fie ma’u ka ke ma’u ‘a e melinó? Ngaahi kaungāme’a lelei? Ko ha fāmili ‘ofa? Haó mo e malú? ‘Oku tau pehē he taimi ‘e ni’ihi ‘oku tau fie ma’u e ngaahi me’a ko ‘ení ka tau ongo’i mo’oni ‘a e melinó. Ka he ‘ikai ‘aupito ha taimi ‘e haohaoa mo fai-gofua peseti ‘e 100 ai ‘a e mo’uí. ‘E

fēfē leva ha’atau fehangahangai mo e ngaahi ‘ahi’ahí mo ongo’i melino ‘i he taimi tatau pē?

‘Oku talamai ‘e he māmaní ‘oku toki ma’u pē e melinó ‘i he taimi ‘oku ‘ikai fai ai ha fepakipakí. Ka ‘oku ‘ikai mo’oni ia! ‘E lava ke foaki mai ‘e Sīsū Kalaisi ‘o fakafou ‘i He’ene ongoongo-lelei, ha melino fakaeloto ‘oku ope atu he melino ‘oku ma’u ‘e he māmaní. Kapau te tau tafoki kiate Ia ‘i he tui,

‘e lava ke tau ongo’i melino ‘i ha fa’ahinga tūkunga pē.

Na’e akonaki e Fakamo’uí ‘o pehē, “Oku ou tuku ‘a e melinó kiate kimoutolu, ko ‘eku melinó ‘oku ou foaki kiate kimoutolú: ‘oku ‘ikai hangē ko e foaki ‘a māmaní, ‘a ‘eku foaki kiate kimoutolú” (Sione 14:27; tānaki atu hono fakamamafa’í). Ko ha ngaahi founga ‘eni ‘oku faikehekehe ai e melino ‘a māmaní mei he melino ‘a Sīsū Kalaisí.

## Melino 'i he Māmaní

1. ‘Oku totonu ke tau ma’u pē ‘a e melinó—‘oku ‘ikai totonu ke tau tali ki ai!

2. He ‘ikai te ke lava ‘o ma’u ‘a e melinó lolotonga e ngaahi faingata’á.

3. Ko e melinó ‘a e taimi ‘oku ‘ikai fai ai ha taú.

4. ‘Oku totonu ke tau ma’u e melinó ‘i ha fa’ahinga founga pē ‘oku tau mo’ui ai.

5. He ‘ikai te ke ma’u ha melino ‘i hono vete ho’o ngaahi angahalá mo e ngaahi vaivaí.

6. ‘Oku ma’u e melinó ‘i ho’o tokanga taha ki ho’o ngaahi fie ma’u.

7. ‘Oku ma’u e melinó mei hono ma’u ha fakangofua mei he ni’ihi kehé.

8. ‘Oku totonu ke tau feinga ke tau ma’u ‘iate kitautolu pē ‘a e melinó.

FAKATĀTĀ ‘O E MĀMANÍ MEI HE GETTY IMAGES

## Melino 'ia Kalaisí

1. ‘E fie ma’u ke tau tatali ‘i ha taimi ‘e ni’ihi ke ma’u ‘a e melinó—kae “‘oua na’á ke fo’i... Falala ki he ‘Otuá pea tui ‘e hoko mai ha ngaahi me’a lelei.”<sup>1</sup>

2. ‘E lava ke ke ma’u e melinó ‘i he lolotonga ‘o e ngaahi faingata’á.

3. ‘E lava ke ke ma’u e melinó ‘i ha fa’ahinga tūkunga pē.


4. ‘Oku ma’u ‘a e melinó ‘i hono mo’ui ‘aki e ongoongolelei mo e talangofua ki he ngaahi fekaú.

5. ‘Oku ma’u ‘a e melinó mei he fakatomala fakamātoató. “Ko e faka’ofo’ofa ‘o e fo’i lea fakatomalá ko e tala’ofa ko ia ‘o hono kalofi e ngaahi palopalema motu’á mo e ngaahi tō’onga mo’ui motu’á mo e ngaahi mamahi motu’á mo e ngaahi angahala motu’á. “Oku kau ia ‘i he ngaahi lea fakatupu ‘amanaki lelei mo fakalotolahi taha—‘io, mo fakanonga taha—‘i he ngaahi lea ‘o e ongoongolelei.”<sup>2</sup>

6. ‘Oku ma’u ‘a e melinó mei he ngāue tokoní mo e hoko ko ha tokotaha fa’a fakalelei ki he ni’ihi kehé.

7. ‘Oku ma’u ‘a e melinó ‘i he’etau feinga ke hoko ko ha ākongā lelei ange ‘a Sīsū Kalaisi.

8. “[Ko e] fa’ahinga melino... ko e pale ‘o e kau mā’oni’oni... ko ha me’afuaki ne tala’ofa mai makatu’unga ‘i he misiona mo e feilaulau fakalelei na’e fai ‘e he Fakamo’uí.”<sup>3</sup>



Kapau te tau fokotu’u ‘a Sīsū Kalaisi ko e uho ‘o ‘etau mo’uí, te tau ongo’i ‘Ene “folofola ‘aki ‘a e fiamālié ki [hotau] laumālié” (‘Alamā 58:11). Te tau a’usia ha ngaahi taimi faingata’a ‘i he māmani ko ‘ení, ka ‘oku tāpuekina kitautolu ‘i he’etau ‘ilo ‘oku ‘i ai ha tokotaha ke tau tafoki ki ai ‘i ha fa’ahinga tūkunga faingata’a pē. Na’e folofola e Fakamo’uí, “Kuó u tala ‘a e ngaahi me’á ni kiate kimoutolu, koe-uhí ke mou ma’u ‘a e fiamālié ‘iate au.

Te mou ma’u ‘a e mamahí ‘i māmani; ka mou loto to’a; kuó u iku’i ‘a māmani” (Sione 16:33). Koe’uhí ko e Fakalelei ‘a e Fakamo’uí, ‘oku malava ke hoko ‘a e melinó ‘i he ‘ahó ni pea ta’engata. ■

### MA’U’ANGA FAKAMATALÁ

1. Jeffrey R. Holland, “An High Priest of Good Things to Come,” *Liahona*, Jan. 2000, 45.
2. Jeffrey R. Holland, “The Peaceable Things of the Kingdom,” *Ensign*, Nov. 1996, 83.
3. Quentin L. Cook, “Melino Fakatāutahá: Ko e Pale ‘o e Anga Mā’oni’oni,” *Liahona*, Mē 2013, 33.